

ფინანსური ანგარიშგების არსი, სახეები, კომაონენტები, მათი ინტერპრეტაცია და მნიშვნელობა

ნათია შენგელია

სოციალურ მეცნიერებათა დოქტორი
ეკონომიკაში, სტუ უფროსი მასწავლებელი

ფინანსური ანგარიშგება ესაა საწარმოს ფინანსური მდგომარეობისა და განხორციელებული სამეურნეო ოპერაციების სტრუქტურულად ჩამოყალიბებული სურათი. მისი მიზანია განხორციელებული საქმიანობის ეფექტის ჩვენება და მომხმარებლისათვის ამ ინფორმაციის მიწოდება.

ფინანსური ანგარიშგება არის დოკუმენტი, სადაც თავს იყრის საწარმოს რესურსების (აქტივები) და ამ რესურსების ფორმირების წყაროების (ვალდებულებების და საკუთარი კაპიტალის) დაჯგუფებული და განზოგადებული ინფორმაცია, რომელიც აუცილებელად გამოხატულია ფულად საზომ ერთეულში.

ბუღალტრული აღრიცხვის საერთაშორისო სტანდარტების მოთხოვნის მიხედვით, ყველა საწარმო გარდა ინდივიდუალური მეწარმეებისა, 2001 წლის 1 იანვრიდან ვალდებული არიან აწარმოონ ბუღალტრული აღრიცხვა და ფინანსური ანგარიშგება ბუღალტრული აღრიცხვის საერთაშორისო სტანდარტების შესაბამისად.

ზოგადად შეიძლება გამოიყოს შემდეგი ფინანსური ანგარიშგების (ფ/ა) ტიპები:

➤ **კონსოლიდირებული** ფინანსური ანგარიშგება არის ჯგუფის ფ/ა, რომელიც წარდგენილია, როგორც ერთი მთლიანი ეკონომიკური ერთეულის ანგარიშგება; აღსანიშნავია კონსოლიდირებულში უმცირესობის წილის ცალკე წარდგენა;

➤ **ინდივიდუალური** ფ/ა არის ანგარიშგება, რომელშიც ინვესტიცია ასახულია კაპიტალში პირდაპირი ინვესტიციის საფუძველზე, ვიდრე ინვესტირებულის გამოქვეყნებული შედეგებისა და წმინდა აქტივების საფუძველზე;

➤ ინფლაციის პირობებში უმეტეს ქვეყნებში ფ/ა მზადდება პირვანდელი ღირებულებების საფუძველზე, ფასების საერთო დონის

ცვლილებებისა და კუთვნილი აქტივების ინდივიდუალური ფასების ზრდის გაუთვალისწინებლად;

➤ ამასთან ერთად, ზოგიერთმა საწარმომ ფ/ა შეიძლება მოამზადოს **მიმდინარე ღირებულების** საფუძველზე, სადაც გაითვალისწინება კუთვნილი აქტივების კონკრეტული ფასების ცვლილებების შედეგები;

➤ **შუალედური** ფინანსური ანგარიშგება ისეთი ფ/ა, რომელიც მოიცავს უფრო მოკლე პერიოდის სრულ ან არასრულ მოცულობის ფ/ა-ს, ვიდრე საწარმოს სრული ფინანსური წელია; მაგ : ნახევარწლიური ან/და კვარტალური;

ფინანსური ანგარიშგება განკუთვნილია შიდა და გარე მომხმარებლისათვის. მომხმარებლები შეიძლება დაიყოს: პირდაპირი ფინანსური ინტერესების მქონე, არაპირდაპირი ინტერესების მქონე და ფინანსურად დაუინტერესებელ მომხმარებლებად.

პირდაპირი ფინანსური ინტერესების მქონე მომხმარებლებს მიეკუთვნებიან: არსებული და პოტენციური ინვესტორები, საკრედიტო ორგანიზაციები, მომწოდებლები და დებიტორები.

არაპირდაპირი ფინანსური ინტერესების მქონე მომხმარებლებს მიეკუთვნება: საგადასახადო სამსახურები, მომსახურე ბანკები, შემკვეთები, სადაზღვევო კომპანიები, სამთავრობო ორგანოები.

ფინანსურად დაუინტერესებელ მომხმარებლებს მიეკუთვნება: სტატისტიკის ორგანოები, აუდიტორული ფირმები, არბიტრაჟი, საზოგადოება.

ფინანსური ანგარიშგების ინტერპრეტაცია წარმოადგენს ფინანსური შედეგების გაანალიზებას-მომგებიანობის, ლიკვიდობისა და საბრუნავი კაპიტალის კოეფიციენტების, გრძელვადიანი ფინანსური სტაბილურობის და სხვა ინვესტორებისათვის თუ დაინტერესებული მხარეებისათვის საინტერესო კოეფიციენტების საშუალებით. იგი იძლევა შესაძლებლობას მოვახდინოთ საწარმოს საქმიანობის შედეგების განხილვა, დაგეგმვა და პროგნოზირება საერთო მასშტაბით, იგი ასევე გვიჩვენებს კავშირს ფინანსური ანგარიშგების სხვადასხვა ნაწილებს შორის, რაც თავის მხრივ საშუალებას იძლევა გაანალიზოთ ბიზნესის შესაძლებლობები და რეალობები აწმყოსა და მომავალში. შესაბამისად, ინტერპრეტაცია არის ის, რაც ფინან-

სურ ანგარიშგებაში მოცემული ინფორმაციას კიდევ უფრო მნიშვნელოვნად აქცევს დაინტერესებული მხარისათვის.

ფინანსური ანგარიშგება მოიცავს:

1. ანგარიშგება ფინანსური მდგომარეობის შესახებ (ბალანსი)
2. ანგარიშგება მოგება / ზარალის შესახებ (სრული შემოსავლის ანგარიშგება)
3. ანგარიშგებას საწარმოს საკუთარ კაპიტალში მომხდარი ცვლილებების შესახებ
4. ანგარიშგებას ფულადი სახსრების მოძრაობის შესახებ
5. ახსნა-განმარტებები

ფინანსური ანგარიშგების შედგენისას აუცილებელია ბუღალტრული აღრიცხვის საერთაშორისო სტანდარტების (ბასს) ძირითადი დაშვებების გათვალისწინება. ეს დაშვებებია: დარიცხვის მეთოდი და ფუნქციონირებადი საწარმოს მეთოდი.

დარიცხვის მეთოდის თანახმად სამეურნეო ოპერაციების შედეგებისა და სხვა მოვლენის აღიარება ხდება მათი მოხდენისთანავე და არა ფულადი ანგარიშსწორების დროს, მაგ: თუ საწარმოში გაიყიდა საქონელი შემდგომი გადახდის პირობით, მაშინ საწარმომ მიერ საქონელზე ფლობის უფლების და განკარგვის რისკის მყიდველზე გადაცემისთანავე უნდა მოხდეს საქონლის გაყიდვიდან მიღებული შემოსავლის და საქონლის მიწოდებიდან წარმოშობილი მოთხოვნების აღიარება. ამავე დროს საწარმომ უნდა მოახდინოს აღნიშნული შემოსავლის მიღებასთან დაკავშირებული ხარჯების აღიარება. მაგალითად ასეთი ხარჯები შეიძლება იყოს რეკლამის, ტრანსპორტირების და ა. შ. ხარჯები. ანუ დარიცხვის მეთოდი ისეა განსაზღვრული, რომ მოიცავს შესაბამისობის პრინციპსაც, რაც იმას ნიშნავს, რომ ხარჯების დაპირისპირება უნდა მოხდეს იმ ამონაგებთან, რომლის მიღებისთვისაც მოხდა აღნიშნული ხარჯების გაწევა.

ფუნქციონირებადი საწარმო - ამ დაშვების თანახმად, ფინანსური ანგარიშგების მომზადებისას იგულისხმება, რომ საწარმო გეგმავს თავისი საქმიანობის გაგრძელებას მომავალში და ასევე არ აპირებს საქმიანობის მასშტაბების შემცირებას.

ფინანსური ანგარიშგების ელემენტებია: აქტივი, ვალდებულება, საკუთარი კაპიტალი, შემოსავლები, ხარჯები, ხოლო ზემოთ ჩამოთ-

ვლილი გავიხილოთ ფინანსური ანგარიშგების შემდეგ კომპონენტებში:

1. ანგარიშგება ფინანსური მდგომარეობის შესახებ (ბალანსი)
2. ანგარიშგება ფინანსური შედეგების შესახებ (მოგება/ზარალის ანგარიშგება)
3. ანგარიშგება საკუთარ კაპიტალში მომხდარი ცვლილებების შესახებ.
4. ანგარიშგება ფულადი ნაკადების შესახებ.
5. ახსნა - განმარტებები.

1. ბუღალტრულ ბალანსს განმარტავენ, როგორც საწარმოს ეკონომიკური რესურსებისა და მთლიანი კაპიტალის მდგომარეობის განზოგადებას ერთი კონკრეტული თარიღისათვის ფულად საზომ ერთეულში.

საწარმოს ეკონომიკურ რესურსებში იგულისხმება საწარმოს ქონება, მატერიალური და არამატერიალური საშუალებების, ფულადი საშუალებების, სამეურნეო საქმიანობის პროცესში წარმოშობილი და ანგარიშსწორებაში არსებული საშუალებების სახით. ანუ ეს არის საშუალებები, რომლითაც საწარმო ახორციელებს წარმოებას ან მომსახურების მიწოდებას. ხოლო საწარმოს მთელი კაპიტალი მოიცავს საკუთარ კაპიტალს და ვალდებულებებს.

ბალანსი ეყრდნობა საბალანსო ტოლობას, სადაც:

აქტივები = კაპიტალი + ვალდებულებები

ბალანსი ორი ნაწილისაგან შედგება, რომელთაგან ერთ-ერთი ასახავს აქტივებს, ანუ ეკონომიკურ რესურსებს და მეორე საკუთარი კაპიტალისა და ვალდებულებების ჯამს. ორმხრივობის პრინციპის შესაბამისად ბალანსის ორივე ნაწილში ტოლფასი სიდიდეები თავსდება.

2. მოგებისა და ზარალის ანგარიშგება საანგარიშო პერიოდის განმავლობაში საწარმოს მიერ მიღებული შემოსავლებისა და ამ შემოსავლების მისაღებად გაწეული ხარჯების დაჯგუფებული ასახვაა, ანუ მოგებისა და ზარალის ანგარიშგება საანგარიშო პერიოდში საწარმოს საქმიანობის ფინანსური შედეგების ამსახველი ანგარიშია. იგი შეიძლება იყოს 2 სახის:

ღარბობრივი ეკონომიკა

აქტივები		ვალდებულებები და საკ. კაპიტალი	
მიმდინარე აქტივები		მიმდინარე ვალდებულებები	
ნაღდი ფული	\$ 23 000	მოკლე ვადიანი სესხი	\$ 18 000
მოთხოვნები	50 000	კრედიტორული დავალიანება	38 000
მარაგი	17 000	სხვა დარიცხული ვალდებულებები	17 000
		სულ მიმდინარე ვალდებულებები	\$ 73 000
სულ მიმდინარე აქტივები	\$ 90 000	გრძელვადიანი სესხი	50 000
		სულ გრძელვადიანი ვალდებულებები	50 000
ძირითადი საშუალებები	45 000	სულ ვალდებულებები	123 000
აკუმულირებული ცვეთა	(5 000)	მოგება	5 000
		საწესდებო აპიტალი	2 000
		სულ ვალდ. და საკუთარი კაპიტალი	\$ 130 000
სულ აქტივები	\$ 130 000		

ბუღალტრულ ბალანსი

ხარჯების შინაარსის მიხედვით		ხარჯების ფუნქციური დანიშნულების მიხედვით	
მოგება-ზარალის ანგარიშგება		მოგება-ზარალის ანგარიშგება	
შპს "X", 01.01.07-31.12.07		შპს "X", 01.01.07-31.12.07	
შემოსავალი რეალიზაციიდან	\$6 000	შემოსავალი რეალიზაციიდან	6000
არასაოპერაციო შემოსავალი	\$1 000	სხვა არასაოპერაციო შემოსავალი	400
ცვლილებები შპს პროდუქციის		მიღებული ფასდათმობა	500
მარაგსა და დაუმთ.წარმოებაში	(200)	რეალიზებული პროდუქციის თჯ.	100
მოხმარ. ნედლ. და მასალები	(100)	საერთო მოგება	6800
პერსონალის შენახვის ხარჯები	(100)	კომერციული ხარჯები	300
ცვეთის ხარჯები	(200)	ადმინისტრაციული ხარჯები	1000
სხვა საოპერაციო ხარჯები	(100)	გაცემული ფასდათმობა	100
საოპერაციო მოგება	6 300	საოპერაციო მოგება	5400
წმ. სა-% ხარჯი	\$ (100)	წმ. სა-% ხარჯი	300
მოგება დაბეგვრამდე	6 200	მოგება დაბეგვრამდე	5 100
მოგების გადასახადი	1240	მოგების გადასახადი	840
წმინდა მოგება	4960	წმინდა მოგება	4260

მოგებისა და ზარალის ანგარიშგება მზადდება დარიცხვის კონცეფციის შესაბამისად. ეს კონცეფცია ნიშნავს იმას, რომ შემოსავალი და ხარჯები აღიარდება მოგებისა და ზარალის ანგარიშგებაში წარ-

მოშობისთანავე, მიუხედავად იმისა იყო თუ არა ფული მიღებული ან გადახდილი.

ჩვეულებრივი საწარმოები მოგებისა და ზარალის ანგარიშგებას ადგენენ დროის ერთწლიანი პერიოდისათვის (ამასთან ცალკეული გამონაკლისების გარდა მისი მომზადება და წარდგენა შესაძლებელია განხორციელდეს ყოველთვიურად ან კვარტალურად), როგორც წესი, საანგარიშო პერიოდი ემთხვევა კალენდარულ პერიოდს (კალენდარულ წელს).

შემოსავლები და ხარჯები, როგორც მოგებისა და ზარალის ანგარიშგების ძირითადი შემადგენელი ელემენტები, ახასიათებენ ბიზნესის კაპიტალის ცვლილებას საანგარიშო პერიოდის განმავლობაში.

შემოსავალი ეს არის საწარმოს ეკონომიკური სარგებლის ზრდა საანგარიშო პერიოდში, აქტივების ზრდისა ან ვალდებულებების შემცირების გზით, რაც გამოიხატება საწარმოს საკუთარი კაპიტალის გადიდებით და რომელიც არ არის დაკავშირებული მესაკუთრეთა მხრიდან დამატებითი შენატანების ხარჯზე საკუთარი კაპიტალის მატებასთან.

ხარჯი არის საწარმოს ეკონომიკური სარგებლის შემცირება საანგარიშო პერიოდის განმავლობაში, აქტივების საწარმოდან გასვლის ან ვალდებულებების ზრდის ხარჯზე, რაც გამოიხატება საწარმოს საკუთარი კაპიტალის შემცირებაში და რომელიც არ არის დაკავშირებული მესაკუთრეთათვის კაპიტალის განაწილებასთან.

3. ბუღალტრული აღრიცხვის საერთაშორისო სტანდარტებით (ბასს) განსაზღვრულია, რომ საწარმომ აუცილებლად უნდა წარმოადგინოს საკუთარი კაპიტალის ცვლილებების ანგარიშგება . ანგარიშგებაში საკუთარი კაპიტალის ცვლილებების შესახებ აისახება ბალანსის წარდგენის ორ თარიღს შორის მომხდარი ის ცვლილებები, რომლებიც მოხდა კაპიტალის სიდიდესა და შედგენილობაში სხვადასვა ოპერაციების შედეგად. ეს ისეთი ცვლილებებია, რომელიც უშუალოდ აისახება მოგებისა და ზარალის ანგარიშგებაში და გვიჩვენებს შემოსავლებსა და ხარჯების დაპირისპირებით წმინდა აქტივების ზრდას და შემცირებას. ასევე ისეთი ცვლილებები, რომელიც არ აისახება მოგებასა და ზარალის ანგარიშგებაში, აღიარდება

საკუთარი კაპიტალის ცვლილებად და აისახება პირდაპირ მის ანგარიშგებაში. ამ უკანასკნელს მიეკუთვნება გადაფასების შედეგი, გასაყიდი ფინანსური აქტივების გადაფასებით მიღებული მოგება ან ზარალი და მათთან დაკავშირებული მიმდინარე და გადავადებული გადასახადებები. ყოველივე ეს იძლევა ბალანსის შედგენის ორ თარიღს შორის საწარმოს ფინანსური მდგომარეობის ცვლილებების შეფასების საშუალებას.

საკუთარ კაპიტალში მომხდარი ცვლილებების ანგარიშების შემდეგი ფორმატი არსებობს ბუღალტრული აღრიცხვის საერთაშორისო სტანდარტების (ბასს) მიხედვით.

ანგარიშგება საკუთარ კაპიტალში ცვლილებების შესახებ

აქციონერული კაპიტალის სტრუქტურა მაჩვენებლები	პრივილეგირებული აქციები (10%- ნომინლ)	ჩვეულებრივი აქციები (1%- ნომინლ)	საემისიო კაპიტალი	სხვა რეზერვები	გაუნაწი ლებელი ოგება	სულ საკუთარი კაპიტალი
ნაშთი წლის დასაწყისისთვის	60,000	50,000	40,000	5,000	25,000	180,000
ჩვეულებრივი აქციების ემისია		5,000	10,000			15,000
პრივილეგირებულის კონვერტირება ჩვეულებრივზე	(30,000)	3,000	27,000			—
დივიდენდის გაცემა		3,000			(3,000)	—
გადატანა				20,000	(20,000)	—
წმინდა მოგება					80,000	<u>80,000</u>
ნაშთი წლის ბოლოსთვის(31.12.0X)	30,000	61,000	77,000	25,000	82,000	<u>275,000</u>

4 . ანგარიშგება ფულადი სახსრების მოძრაობის შესახებ ფინანსური ანგარიშგების ერთ-ერთი ელემენტია. სწორედ ფულადი ნაკადების ანგარიშგება აძლევს ინფორმაციას ფინანსური ანგარიშგების მომხმარებლებს საწარმოში ფულისა და ფულის ექვივალენტების

ცვლილების ძირითადი ანუ საოპერაციო საქმიანობის, საინვესტიციო და საფინანსო საქმიანობის მიხედვით ფულადი სახსრების მოძრაობის შესახებ საანგარიშგებო პერიოდში. იგი ეხმარება მომხმარებელს საწარმოს აქტივებში მომხდარი ცვლილებების, ფინანსური სტრუქტურისა და ფულის რაოდენობის ცვლილებების შეფასებაში, საწარმოს ლიკვიდობის მდგომარეობის შეფასებაში, ძირითადი ტიპის ფულადი სახსრების ნაკადების შესახებ ინფორმაციის მიღებაში, სამომავლო ფულადი ნაკადების შეფასებაში და ა. შ. თუმცა ფინანსური ანგარიშგების ამ კომპონენტს ხარვეზებიც გააჩნია, კერძოდ მასში არ აისახება არაფულადი ოპერაციები. მაგ: ბონუსური აქციების გამოშვება და ა.შ. არაფულადი ოპერაციებით მომხმარებლები დაინტერესებულნი არიან, რადგან ისინი მომავალი ფულადი ნაკადების მოძრაობაზე ახდენენ გავლენას. ასევე ფულადი ნაკადების შესახებ ანგარიშგება ძირითადად ასახავს წარსულის ინფორმაციას და სხვა.

ფულადი ანგარიშგება შეიძლება მომზადდეს პირდაპირი და არაპირდაპირი მეთოდით:

თავად ბუღალტრული აღრიცხვის საერთაშორისო სტანდარტები (ბასს) 7 განმარტავს ფულადი ნაკადების ანგარიშგებაში მოცემულ ძირითად ტერმინებს. კერძოდ:

ფულად სახსრებში იგულისხმება ფულადი სახსრები სალაროში და მოთხოვნამდე დეპოზიტები. ფულის ეკვივალენტი ეს არის მოკლევადიანი მაღალი ლიკვიდობის მქონე ინვესტიციები, რომელთა განსაზღვრულ ფულად სახსრებად კონცენტრაცია ადვილად შესაძლებელია და მათი ღირებულების ცვლილებასთან დაკავშირებული რისკი ძალიან მცირეა. ამრიგად ინვესტიციები წარმოადგენს ფულის ეკვივალენტს თუ არის ადვილად კონცენტრირებადი და თუ ღირებულების ცვლილების რისკი დაბალია ან საერთოდ არ არსებობს.

რაც შეეხება საოპერაციო, საინვესტიციო და საფინანსო საქმიანობას. **საოპერაციო საქმიანობა** არის საწარმოსთვის ძირითადი შემოსავლების მომტანი, ანუ წარმოიქმნება იმ საქმიანობიდან, რომელსაც საწარმოსთვის ძირითადი შემოსავლები მოაქვს. **საინვესტიციო საქმიანობასთან** დაკავშირებული ფულადი ნაკადები არის შემდეგი: ძირითადი საშუალებების, არამატერიალური აქტივების და სხვა გრძელვადიანი აქტივების შესაძენად გადახდილი ფული, ასევე მა-

თი რეალიზაციიდან შემოსული თანხები, კაპიტალიზებული დანახარჯები სამეცნიერო - კვლევით სამუშაოებზე და საკუთარი წარმოების ძირითად საშუალებებზე, ფასიანი ქაღალდების შესაძენად გადახდილი, ავანსად და სესხის სახით სხვა პირებზე გაცემიდან მიღებული ფული და მიღებული პროცენტები.საფინანსო საქმიანობასთან დაკავშირებულ ფულად ნაკადებს, ესენია: აქციების შესაძენად და გამოსაყენებლად გადახდილი ფულადი სახსრები, ობლიგაციების, თამასუქების, სესხების გამოშვების შედეგად მიღებული ფულადი სახსრები. ასევე სესხების დასაფარად გადახდილი ფულადი სახსრები, ფინანსური იჯარის შედეგად წარმოშობილი ვალდებულებების შესამცირებლად გადახდილი ფულადი სახსრები და ა.შ. აქედა გამომდინარე, საფინანსო საქმიანობა არის ისეთი საქმიანობა, რომლის შედეგად რაოდენობრივად და სტრუქტურულად იცვლება საწარმოს საკუთარი კაპიტალი და ნასესხები საშუალებები.

5. ფინანსური ანგარიშგების **ახსნა - განმარტებები** წარმოადგენს ბალანსის, მოგება/ზარალის, ფულადი ნაკადების ანგარიშგების, საკუთარი კაპიტალის ცვლილებების ანგარიშგების დეტალურ აღწერას. ახსნა - განმარტებებში თავს იყრის ინფორმაცია, რომელიც აუცილებელია ბუღალტრული აღრიცხვის საერთაშორისო სტანდარტების მოთხოვნით, ან ისეთი ინფორმაცია, რომელიც აუცილებელია საწარმოს შესახებ ინფორმაციის სამართლიანი წარდგენისათვის.

როგორც ზემოთ ავღნიშნეთ **ფინანსური ანგარიშგების ინტერპრეტაცია** წარმოადგენს ფინანსური შედეგების გაანალიზებას-მომგებიანობის, ლიკვიდობისა და საბრუნავი კაპიტალის კოეფიციენტების, გრძელვადიანი ფინანსური სტაბილურობის და სხვა ინვესტორებისათვის თუ დაინტერესებული მხარეებისათვის საინტერესო კოეფიციენტების საშუალებით. როცა საუბარია ფინანსური ანგარიშგების ინტერპრეტაციაზე, თავდაპირველად უნდა დადგინდეს ვინ არის ფინანსური ანგარიშგების მომხმარებელი და რა სახის ინფორმაცია სჭირდება მას. ფინანსური ანგარიშგების ინტერპრეტაციისას უამრავი კოეფიციენტის გამოთვლა შეიძლება, ამიტომ აქ გათვალისწინებული უნდა იყოს ვინ არის დაინტერესებული მხარე. მაგ, საწარმოს მენეჯერებს აინტერესებთ საწარმოს საქმიანობის ყველა ასპექტი,

ამიტომ შესაძლებელია მათ მოითხოვონ თითოეული კატეგორიის ყველა ძირითადი კოეფიციენტის გაანალიზება. აქციონერებს აინტერესებთ ძირითადად საინვესტიციო საქმიანობის ამსახველი კოეფიციენტები, თუმცა მათთვის ასევე საინტერესოა სტაბილურობისა და მომგებიანობის ზოგიერთი მაჩვენებელიც. მაგ: ლევერიჯისა და დაბანდებული კაპიტალის უკუგების კოეფიციენტი. კოეფიციენტების დაჯგუფების ერთ-ერთი ხერხია მათი დაჯგუფება შინაარსის მიხედვით, შემდეგნაირად:

1. მომგებიანობის კოეფიციენტები, რომლებიც მოიცავს შემდეგს:

- საერთო მოგების მარჟა.
- წმინდა მოგების მარჟა.
- დაბანდებული კაპიტალის უკუგების კოეფიციენტი.
- წმინდა აქტივების ბრუნვის კოეფიციენტი.

2. ლიკვიდობისა და საბრუნავი კაპიტალის კოეფიციენტები:

- მარაგის ბრუნვის კოეფიციენტი.
- დებიტორული დავალიანების დაფარვის პერიოდი.
- კრედიტორული დავალიანების დაფარვის პერიოდი.
- მიმდინარე ლიკვიდობის კოეფიციენტი.
- სწრაფი ლიკვიდობის კოეფიციენტი.

3. გრძელვადიანი ფინანსური სტაბილურობის კოეფიციენტები.

- ლევერიჯი.
- პროცენტის დაფარვის კოეფიციენტი.

4. ინვესტორებისათვის საინტერესო კოეფიციენტები.

- შემოსავალი ერთ აქციაზე.
- აქციის საბაზრო ფასისა და შემოსავლის ფარდობის კოეფიციენტი.

- დივიდენდური შემოსავლიანობის კოეფიციენტი.

- დივიდენდის დაფარვის კოეფიციენტი.

ამრიგად, ფინანსური ანგარიშგებას დიდი მნიშვნელობა გააჩნია. ესაა საწარმოს ფინანსური მდგომარეობისა და განხორციელებული სამეურნეო ოპერაციების სტრუქტურულად ჩამოყალიბებული სურათი. მისი მიზანია განხორციელებული საქმიანობის ეფექტის ჩვენება და მომხმარებლისათვის ამ ინფორმაციის მიწოდება. ფინანსური ანგარიშგების ინტერპრეტაცია წარმოადგენს ფინანსური

შედეგების გაანალიზებას-მომგებიანობის, ლიკვიდობისა და საბრუნავი კაპიტალის კოეფიციენტების, გრძელვადიანი ფინანსური სტაბილურობის და სხვა ინვესტორებისათვის თუ დაინტერესებული მხარეებისათვის საინტერესო კოეფიციენტების საშუალებით. იგი იძლევა შესაძლებლობას მოვახდინოთ საწარმოს საქმიანობის შედეგების განხილვა, დაგეგმვა და პროგნოზირება საერთო მასშტაბით. იგი ასევე გვიჩვენებს კავშირს ფინანსური ანგარიშგების სხვადასხვა ნაწილებს შორის, რაც, თავის მხრივ, საშუალებას იძლევა გავაანალიზოთ ამა თუ იმ ბიზნესის შესაძლებლობები აწმყოსა და მომავალში, ასევე შევადაროთ კონკრეტული კომპანიის მონაცემები ბაზარზე არსებულ საშუალო მაჩვენებლებთან, აქედან გამომდინარე შევაფასოთ კონკურენტები და დავგეგმოთ სათანადო ფინანსური სტრატეგია კონკურენტული უპირატესობის მოსაპოვებლად.